



Inatsisartunut ilaasortaq Otto Jeremiassen, Siumut

## **Attumi Niaqornaarsummilu isertitsivinnik qaqugu pilersitsisoqarnissaanik § 36, imm. 1 malillugu apeqqutigineqartumut akissut**

29.03.2006  
J.nr. 01.20.06

Asasara Otto Jeremiassen.

Postboks 260  
3900 Nuuk  
Oq/tel +299 34 50 00  
Fax +299 32 45 47  
[ilapi@gh.gl](mailto:ilapi@gh.gl)  
[www.nanoq.gl/ilapi](http://www.nanoq.gl/ilapi)

Inatsisartut suleriaasianni § 36, imm. 1 malillugu Naalakkersuisut qinnuigaatit paasissutissiissutigeqqullugu Attumi Niaqornaarsummilu isertitsivinnik pilersitsisoqarnissaa Naalakkersuisut qaqugu naatsorsuutiginaat.

Tigummigallagassanik aalakoortunillu allanillu inissiinissamut nunaqarfinni ator-tulersuutit pillugit apeqqut Eqqartuussiveqarneq Pillugu Ataatsimiititaliarsuup isumaliutissiissutaani sammineqarsimavoq. Naalakkersuisut naatsorsuutigimmassuk isumaliutissiissut Kalaallit Nunaanni eqqartuussiveqarnerup annertuumik iluar-sartuuteqqinnissaanut tunngaviliisuujumaartoq uanga naatsumik ataatsimiititaliarsuup apeqqummik tassanga suliarinnissimanera nassuiaateqarfignissavara.

Eqqartuussiveqarneq Pillugu Ataatsimiititaliarsuup isumaliutissiissutaani takune-qarsinnaavoq ataatsimiititaliarsuup Nuummi 1997-imi martsimi ataatsimeersuar-titsineranut atatillugu nunaqarfimmiunit arlalinnit init isertitsivigineqarsinnaasut ujar-torneqarsimasut, taamaallutik kommunefogedit aalakoortut, kamattut allallu isumannaatsumik inissiivissaqartinniassamatigit.

Tamanna tunngavigalugu Kalaallit Nunaanni Politimesteri nunaqarfinni isertitsiviit pisariaqartitaanerannik 1998-imi februarimi misissuisitsilerpoq. Misissuinikkut siunertaavoq aalakoortunut inunnullu allanut sivikitsumik kiffaanngissusiiagassan-ut/inissitassanut ininik pisariaqartitsinerup paasiniarneqarnissaa. Politeeqarfiit pisortaasa kommunefogedillu inunnik kiffaanngissusiiakkanik – imaluunniit naleqquttumik inissiivissaqarsimasuuppat taamaaliugassaasimagaluartunik - nalu-naarsuineri tunngavigalugit nunaqarfinni isertitsivinnik pisariaqartitsisoqartoq misis-suinikkut paasineqarpoq.

Politimesteri misissuinermit aallartitsisitsinermini erseqqissaavoq nunatsinni nuna-qarfinni tamani isertitsivinnik sanaartornissaq akisuujussasoq taamaamallu eqqarsaatigiuminaatsoq nalinginnaasumik paasinnittarnertut (ikuallattuulernissa-mut kalerrisaarutilinnik, aggeqqusisarfilinnik immikkullu aaqqissuussanik ineerar-

talinnik) isertitsiveqalernissaa. Taamaamat politimesterip kaammattuutigaa eqqarsaatigineqartariaqartoq ininik naleqquttunik nunaqarfinni atugassiisoqarnissaanut sunik periarfissaqarnersoq, immaqa oqartussaasunit allanit tamakkunanee-reersunit attartukkanik.

Misissuinikkut paasineqarpoq nunaqarfinni kiffaangissusiiakkat pissutsini iluannigitsuni ininilu siunertamut naleqqutinngitsuni inissinneqakkajuttartut. Nunaqarfiit ilaanni init nunaqarfimmi aqutsisunit innersuunneqartut (atortoqanngitsuukkajuttut) atorneqartarput. Inissiivissanik innersuussisoqarsinnaanngikkaangat kommune-fogedit aalakoortunut nammineq angerlarsimaffitsik atortariaqartarpaat, tamanna kommune-fogedit ilaquuttatik eqqarsaatigalugit toqqjissisimanartuutinngilaat.

Peqatigitilluguli misissuinikkut paasineqarpoq kiffaangissusiiakkat ikittuinnaasartut.

Ataatsimiititaliarsuaq tamanna tunngavigalugu isumaqarpoq politiit kommunit suleqatigalugit misissortariaqaraat nunaqarfinni init pigineqareersut naleqquttut kiffaangissusiiiaanermut atorneqarsinnaanersut.

Ataatsimiititaliarsuup aalajangiineranut uiggiullugu kommunit politeeqarfiillu KANUKOKA-mit Politimestereqarfimmiillu misissuinerup inerneranik ilisimatineqarput ininillu kiffaangissusiiiaanermut naleqquttunik toqqaaqqullugit suleqatigiileqqullugit kaammattorneqarlutik.

Politeeqarfiit kommunillu suleqatigiinnertik pillugu nalunaaruteqarneranni politeeqarfiit kommunillu ilaasa oqaatigaat init pigineqareersut kiffaangissusiiiaanermut atorneqarsinnaasasut politeeqarfiillu aamma kommunit ataasiakkaat siunnersuuteqarlutik nunaqarfinni isertitsisarfinnik sanasoqartariaqartoq, assersuutigalugu illunut siunertanut arlalinnut atorneqarsinnaasunik isertitsisarfitalinnik imaluunniit illuaqqanik katiteriaannarnik isertitsisarfitalinnik.

Politeeqarfiit amerlanersaanni ataatsimut isigalugu ikittuaraannarnik kiffaangissusiiasoqartarpoq (qaammatini tallimani 0-imiit qulingiluanut) ilaatigullu tamanna tunngavigalugu politeeqarfiit arlallit naliliipput isertitsisarfinnik sanasoqarnissaa pisariaqanngitsoq.

Politeeqarfiit kommunillu suleqatigiinnerisigut angusat tunngavigalugit Eqqartuussiveqarneq Pillugu Ataatsimiititaliarsuaq isumaqanngilaq nunaqarfinni isertitsisarfinnik sanasoqarnissaanut aningaasanik immikkoortitsisoqarnissaa pisariaqartinneqanngitsoq. Ikittuinnarnik kiffaangissusiiasoqartarmat ataatsimiititaliarsuup isumaa malillugu nunaqarfinni isertitsiviliormissamut nukissanik atuisoqarnissaa naleqqutinngilaq.

Ataatsimiititaliarsuup isumaa malillugu taarsiullugu nunaqarfinni kiffaangissusiiasarnerit sapinngisamik killilerniarneqartariaqarput, taamaalillutik politiit - kiffaangissusiiiaanermut taarsiullugu – aalakoortut allallu nammineq angerlarsimaffiannukaattarlugit, ilisarisisamaannukaattarlugit ilaquataannukaattarlugilluunniit, taak-

kunani isumannaallisaanermik pissuteqartumik pisariaqartinneqaraangat kommuni-  
fogedimit nakkutigineqartassammata.

Qaqutigoortumik kiffaanngissusiiqaartoqartariaqalersillugu kiffaanngissusiiaga-  
asut nunaqarfinni inini pigineqareersuni imaluunniit politeeqarfimmi isertitsivimmi  
ininiluunniit allani inissinneqartariaqartassapput.

Eqqartuussiveqarneq Pillugu Ataatsimiititaliarsuup isumaliutissiissummini  
oqaatigaattaaq Kalaallit Nunaanni Politimesterip politeeqarfinnut kaammat-  
tuutigisimagaa aalakoortut – illersorneqarsinnaatillugu – isertitsivinnukaannagit  
nammineq angerlarsimaffiinukaanneqartassasut. Kaammattuut illoqarfinnut nuna-  
qarfinnullu atuuppoq.

Naalakkersuisut 2006-imi ukiuunerani ataatsimiinnermi Eqqartuussiveqarneq Pil-  
lugu Ataatsimiititaliarsuup isumaliutissiissutaanut Namminersorerullutik Oqartus-  
sat oqaaseqaateqarnissaat pillugu Inatsisartut aalajangiiffigisassaattut siunnersuut  
saqqummiuppaat. Naalakkersuisut tassani inassutigaat Inatsisartut ataatsimiititali-  
arsuup isumaliutissiissutaani taaneqartut eqqarsaatigalugit Eqqartuussiveqarneq  
Pillugu Ataatsimiititaliarsuup siunnersuutaanut kaammattuutaanullu isumaqataallu-  
tik taasissasut, kisiannili puigortariaqarani pinerluttuliortarnerup allanngoriartornera  
taamanikkut ataatsimiititaliarsuup naatsorsuutigisimasaanit allaanerungaatsiaqim-  
mat. Aalajangiiffigisassatut siunnersuut upernaakkut ataatsimiinnissami aappas-  
saanneernejassasoq naatsorsuutigineqarpoq.

Taamaammat Naalakkersuisut naatsorsuutiginngilaat ungasippallaanngitsukkut  
nunaqarfinni Attumi Niaqornaarsummilu isertitsisarfilliortoqarnissaa.

Taamaakkaluartoq Naalakkersuisut tamakkiisumik isumaqatigisinnaavaat kiffaanng-  
gissusiiakkat pissutsini siunertamut naleqquttuni ininilu siunertamut naleqquttuni  
inissinneqartariaqartassammata.

Taamaammat Naalakkersuisut Kalaallit Nunaanni Politimesteri aamma Kommu-  
neqarfik Kangaatsiaq ajornartorsiummut oqaaseqaateqaqqullugit qinnuigaat  
taamatuttaaq siunnersuuteqaqqullugit qanoq iliorluni inissiisarnermi pissutsit pit-  
saanerulersinneqarsinnaanersut. Akissutigineqartut saqqummeriarpata Inatsisar-  
tunut ingerlatinneqarumaarput.

Naggasiullugu periarfissaq atorniarpara eqqartuussiveqarnermut tunngasunut so-  
qutiginninnerit pillugu qutsavigalutit, tamannami pisariaqartinneqartutut pitsaalluin-  
nartutullu uanga isigigakku.

Inussiarnersumik inuulluaqqusillunga

Aleqa Hammond

Ilaqutariinnermut Inatsisinillu Atortitsinnermut Naalakkersuisoq